

Акафист ко Пресвятой Богородице пред иконой «Всецарица»

--

Кондак 1

Новоявлённой Твоей иконе предстояще вёрнии умíльно, воспевáем Ти, Всецарице, рабí Твой; низпослí цельбы к Тебé притека́ющим, да вси радóстно зовём Ти:

Рáдуйся, Всецари́це, недúги нáша благодáтию исцеля́ющая.

Ўкос 1

А́нгел предстáтель с Небесé спед, рече́ Всецари́це: рáдуйся! И боговещáнным глáсом воплоща́ема Тя зря, Гóсподи, возопí к Ней таковáя:

Рáдуйся, главíзно нáшего спасéния; рáдуйся, исполнэ́ние Зиждíтелева смотре́ния.

Рáдуйся, я́ко Тобóю Бог воплотíся; рáдуйся, я́ко Невíдимый в Тебé изобразíся.

Рáдуйся, Мíлость мíра внутрь прия́вшая; рáдуйся, оде́яние плóти Сло́ву исткáвшая.

Рáдуйся, умú непостíжная гóрняя сла́во; рáдуйся, сердца́ оживíвшая небéсная ма́нно.

Рáдуйся, звездó, благодáти сия́ние; рáдуйся, истóчнице, живы́я воды́ излия́ние.

Рáдуйся, Богорóдице, в жена́х благословéнная; рáдуйся, рóждшая Спáса Дéво нетлéнная.

Рáдуйся, Всецари́це, недúги нáша благодáтию исцеля́ющая.

Кондак 2

Безначáльное Сло́во Отрочá младо́ Тобóю бысть, исцелéния пода́я Тя, Дéво, чтúщим и неизречéнное Егó Рождество́ воспевáющим: Аллилу́ия.

Їкос 2

Рáзум недоразумева́емый разумéти Дéва йщущи, возопí к служа́щему: «Яко Отрокови́ца чíстая, ка́ко б́уду Вь́шняго Мáти – изъяснi Ми?»». К Ней же Гавриiл рече со страхом, зовiй таковáя:

Рáдуйся, Совéта Вь́шняго избрáннице; рáдуйся, глáса моля́щихся скоропослу́шнице.

Рáдуйся, Сокрóвище Христóва мiра; рáдуйся, людéй Твоiх надéждо и сiло.

Рáдуйся, ра́ковыя я́звы дiвная губiтельница; рáдуйся, прóчих болéзней исцелiтельница.

Рáдуйся, едiное мiру заступлéние; рáдуйся, вéрное в скóрбех избавлéние.

Рáдуйся, плач и слéзы прiсно утoляющая; рáдуйся, спасéния вхóды всем отверзáющая.

Рáдуйся, держáвный покрóве Афóн населя́ющих; рáдуйся, жéзле мона́хов и миря́н.

Рáдуйся, Всецарiце, недúги нáша благодáтию исцеля́ющая.

Кондáк 3

Сiла Вь́шняго осени́вши Тя, Отрокови́це, плоть прiят неизречéнно, показá Тя селó слáдкое хотя́щим жáти спасéние и пою́щим: Аллилу́ия.

Їкос 3

Прослáвился дiвно святáя икóна Твоя́, «Всецарiца» имену́емая, егда́ цельбоно́сно явiся Твоé, Богомáти, изображéние; вопию́щим же пред ним с вéрою исцелéния подаéши, да умножáются пéсни сицевы́я:

Рáдуйся, Мáти незаходiмага Свéта; рáдуйся, претерпéвших до концá побéдо.

Рáдуйся, в болéзнях и скóрбех сýщим врачевáние; рáдуйся, сирóт и вдови́ц нерушiмая стено́.

Рáдуйся, двéри рáйския отверзáющая; рáдуйся, тружда́ющихся и обременéнных заступа́ющая.

Рáдуйся, о спасéнии вéрных ходáтаице; рáдуйся, за род челове́ческий моли́твеннице.

Рáдуйся, лéстнице небéсная, возводя́щая от земли́ к небесi; рáдуйся, водó живáя, омывáющая смéртныя грехi.

Ра́дуйся, а́гнице, сердца́ незло́бивых храня́щая; ра́дуйся, покрóве, чад Цéркве осеня́ющий.

Ра́дуйся, Всеца́рице, неду́ги на́ша благода́тию исцеля́ющая.

Конда́к 4

Живо́т ми́рови да́руя, Влады́ка ми́ра всели́ся во утробу́ Твою́ неискусому́жно, Ма́терь ве́рных Тя показав, в ми́ре тех воспева́ти призва́: Аллилу́ия.

И́кос 4

Пресла́вная соде́яшася о Тебе́, Гра́де Бо́жий, исцелéнием быва́ющим от святы́я ико́ны Твоея́; сегó ра́ди цельбоно́сныя стру́и врачеваний приéмлюще, благода́рственно, о Всеца́рице, вопиéм:

Ра́дуйся, сна́добие, боль утоля́ющее; ра́дуйся, прохлáдо, жар недужных остужа́ющая.

Ра́дуйся, прижига́ющая ра́ковыя я́звы áки пла́менем; ра́дуйся, подыма́ющая со одра́ оста́вленных врачми́.

Ра́дуйся, лик Свой пречы́стый избра́нным явля́ющая; ра́дуйся, от грехо́вных уз разреша́ющая.

Ра́дуйся, я́ко Тобо́ю избавлéние от смéрти дарова́ся; ра́дуйся, я́ко Тобо́ю неизчётный сонм ве́рных оправда́ся.

Ра́дуйся, высотó, челове́ческими по́мыслы неизсле́дованная; ра́дуйся, глубино́, еди́ным Сло́вом извéданная.

Ра́дуйся, проро́чествие прэ́жде Тебе́ бывших патриáрхов; ра́дуйся, наста́внице Тебе́ молившихся иерáрхов.

Ра́дуйся, Всеца́рице, неду́ги на́ша благода́тию исцеля́ющая.

Конда́к 5

Пречы́стый Храм Спа́сов позна́хом Тя, Отрокови́це; к Тебе́ припада́ем, Чы́стая, да нас содела́еши хра́мы Божества́, вопи́ющих Ему́: Аллилу́ия.

Їкос 5

Видеша чїни ангельстїи на руку Твоєю Создавшаго рукою человеки, и яко Владычицу разумевающе Тя єдину, аще и Рабою Себе нарекла еси, потщашася пєсньми послужити Ти, Благословенней, сицевыми:

Радуйся, Богом поставленная превыше Небесных Сил; радуйся, чудесными исцеленьми исполняющая мир.

Радуйся, хвалу и славу от небес слышашая; радуйся, благодарение от земли приемлющая.

Радуйся, яко семя тли в сердцах потребила еси; радуйся, яко козней диавольских ярем сокрушила еси.

Радуйся, юдоль плачевную исполнившая радостію; радуйся, скорби изменяющая в небесную сладость.

Радуйся, благоухание Богу приятное; радуйся, кающихся грешников веселие изрядное.

Радуйся, бронє правды от искушений; радуйся, щите ограждения от вражды и нестроений.

Радуйся, Всецарице, недуги наша благодатию исцеляющая.

Кондак 6

Проповедницы богоглаголивии, Спасовы ученицы, предсташа Ти, Дево, чудно, егда от земли к небесї восходила еси, да единым сердцем и усты воспоят Богови: Аллилуїя.

Їкос 6

Воссия дивно благодать от иконы Твоея, Всецарице, егда юноша, учеными сатанинскими омраченный, пред нею падє и недвижим бысть; паче чаяния же от уз мрачных свободенный, со страхом и радостію зываше Ти сїце:

Радуйся, исправление нечестиваго жития; радуйся, утешение страждущих люте.

Радуйся, бесовских полчищ от Церкви отгнание; радуйся, мглы греховныя разсеяние.

Радуйся, козней невидимых упразднение; радуйся, демонских чар всемошное одоление.

Рáдуйся, светíльнице, прельщённых наставляяй; рáдуйся, óблаче, невíнных от зла покрывáяй.

Рáдуйся, хóлме, небéсною мáнною пита́ющий; рáдуйся, доли́но, смире́нием Христо́вым насыща́ющая.

Рáдуйся, ка́меню Небéснаго Ца́рствия; рáдуйся, зерка́ло превéчнаго Свёта.

Рáдуйся, Всецари́це, недúги нáша благодáтию исцеля́ющая.

Конда́к 7

Хотя́ дáти Себé в снeдь вёрным, Христé Бóже, благоволи́л еси́ от Дéвы воплотíтися, да приéмлюще Пречíстое Тéло и Кровь Твою́, позна́ют Тя Бóга совершённаго; тёмже дивя́щаяся неизречённей премúдрости сей зовём: Аллилу́ия.

И́кос 7

Но́вое показá тайнство я́влься Зиждíteль, со ученикí сверши́вый Тайную Свою́ Вéчерю; мы же, моля́ще Всецари́цу удостóити нас Божéственныя Святýни, восписúем Ей сицевáя:

Рáдуйся, подáтельнице Небéснаго Хлéба; рáдуйся, родíteльнице Вéчнаго Животá.

Рáдуйся, ча́ше, Христу́ приобщáющая; рáдуйся, дúшу и тéло с Бóгом сочетава́ющая.

Рáдуйся, лжи́це златáя, испóльнь Божéственных Таин; рáдуйся, драгíй кивóте, вместíлище вели́кия Святýни.

Рáдуйся, пёрсте, на святúю Евхаристию указúяй; рáдуйся, трапéзо, предлага́ющая нам Пíщу Святúю.

Рáдуйся, достóйных причáстников одесnúю поставля́ющая; рáдуйся, ревнítелей Божéственныя Литургíи от áда избавля́ющая.

Рáдуйся, приводя́щая смёртных к Исто́чнику безсмёртия; рáдуйся, огражда́ющая чад Свои́х мíром и крéпостию.

Рáдуйся, Всецари́це, недúги нáша благодáтию исцеля́ющая.

Кондак 8

Странный Рождество видевше, житийское всякое отложше попечение, горе имеем сердца; на сие бо Вышний явился, во еже привлещи Тому вопиющих: Аллилуия.

Икос 8

Неотступно в недрах Отческих пребывая, Слово неописанное на земли плоть бысть; Бог Великий сотвори величие Деве и призре на смирение Рабы Своея, слышащая сицевая:

Радуйся, невместимаго Бога вместившая; радуйся, надмирнаго Творца миру явившая.

Радуйся, яко сокрушился смерти держава; радуйся, яко исцелился Адамова рана.

Радуйся, пластырю, струпы душевныя заживляяй; радуйся, елее, язвы телесныя умащаяй.

Радуйся, утоление болезней раждающих; радуйся, облегчение мук умирающих.

Радуйся, нанесящая поражение аду; радуйся, притупившая смерти жало.

Радуйся, чаяние всеобщаго воскресения; радуйся, православных несомненное спасение.

Радуйся, Всецарице, недуги наша благодатию исцеляющая.

Кондак 9

Всякое естество ангельское и человеческое удивися величию непостижимаго Твоего воплощения, Слове; недоумеваяще же о сей велией тайне благочестия, со страхом и трепетом благодарственно зовем Ти: Аллилуия.

Икос 9

Многоразличными недуги одержимии, о Всецарице, от святыя иконы Твоея паче чаяния исцеления получают, да приемше верою благодать, велегласно взывают Ти:

Радуйся, здравых чад присное сохранение; радуйся, болящих ко здравию предложение.

Ра́дуйся, дете́й недугующих исцеление; ра́дуйся, юных страдальцев Ма́ти.

Ра́дуйся, востание на одр болезни поверженных; ра́дуйся, отрадо страхом смертным одержимых.

Ра́дуйся, внемлющая человеков рыданиям; ра́дуйся, призревающая на наша стенания.

Ра́дуйся, бо́лей земных небесною радостью растворение; ра́дуйся, люте обуеваемых пачеестественное терпение.

Ра́дуйся, яко уготавлиаеши плачущим радость; ра́дуйся, яко снабдеваеши кратких крилома молитвы.

Ра́дуйся, Всецарице, недуги наша благодатию исцеляющая.

Конда́к 10

Спасти́ хотя́ Зиждитель истле́вшее грехом челове́ческое естество́, сниде на Тя, яко́ дождь на рунó, и купину́ Тя соде́лав неопали́мую, Бог сый бысть челове́к, да воспева́ем Ему́: Аллилу́ия.

И́кос 10

Стена́ еси́ де́вам, Отрокови́це чи́стая, и всем о чистоте́ радя́щим: в Тя бо всели́ся Бог, очища́яй разума́я создания Сво́я, да избывше вся́кия скверны, предлага́ем Ти сицевая́:

Ра́дуйся, молча́ния взыску́ющих собеседнице; ра́дуйся, вене́че храня́щих де́вство.

Ра́дуйся, нача́ло и коне́ц духо́внаго соверше́ния; ра́дуйся, храни́лище Божественнаго Открове́ния.

Ра́дуйся, Тро́ического Совета́ тайнице; ра́дуйся, спасе́ния человеков вино́внице.

Ра́дуйся, верши́но, го́рдым умо́м непристу́пная; ра́дуйся, убежи́ще, смире́нным сердца́м досту́пное.

Ра́дуйся, чи́стая, небесе́ чистей́шая; ра́дуйся, Херуви́мов и Серафи́мов честней́шая.

Ра́дуйся, обра́дованная, яко́ прия́ла еси́ от Арха́нгела ра́дование; ра́дуйся, утеше́нная, яко́ ру́це Тво́й осяза́сте воскресе́шаго Христа́.

Ра́дуйся, Всецарице, недуги наша благодатию исцеляющая.

Кондак 11

Пение тщащесе разумное Спасу приносити, всегда неключими, Владычице, остаемся раби Твои; кто бо может достойно воспети Бога, Егоже имя яко миро изливанное? Сего ради вопием Ему: Аллилуия.

Икос 11

Свет велий возсияв во тме седящим, посети нас Восток свбше, Сын и Бог Твой, о Дево; Ты соделав свещю на свещнице, светоносным чадом церковным наказует приносити Ти сицевая:

Радуйся, заре Умнаго Солнца; радуйся, вместилище Божественнаго Огня.

Радуйся, свете, яко одеяние святых соткала еси; радуйся, свеще, яко тму бесовскую отгнала еси.

Радуйся, косных умов Просвещение; радуйся, грешных сердец Озарение.

Радуйся, деснице, из моря суетствий изводящая; радуйся, луче, путеводящая к Царствию спасающихся.

Радуйся, молние, нераскайнных поражающая; радуйся, громе, губителей устрашающий.

Радуйся, омраченныя совести просветление; радуйся, Божия Судя умилоствление.

Радуйся, Всецарице, недуги наша благодатию исцеляющая.

Кондак 12

Благодать дати восхотев, Закона Ветхаго Податель Завет Новый нам дарова; мы же, благодать приимше, не дела закона, но единою верою спасение улучивше, восписуем вси: Аллилуия.

Икос 12

Поюще Твое рождество, Богомати, якоже древле Израиль в кимвалех сеновную скинию воспеваше, тако мы ныне Тя, Скинию истинну, добродетельми прославляем, да слышиши от всех сицевая:

Радуйся, песне, воспеваемая горе; радуйся, псалме, слышимый низу.

Радуйся, Единому Богу достойно послужившая; радуйся, Божественней Троице смирением угодившая.

Ра́дуйся, веки Носящаго носившая в Себе; ра́дуйся, престоле Содержащаго Вселенную в руке.

Ра́дуйся, тайно неизреченная веков и времен; ра́дуйся, упование твердое народов и племен.

Ра́дуйся, сердечное радование иереев благоговейных; ра́дуйся, быстрое слышание молитв церковных и келейных.

Ра́дуйся, Премудрости доме богозданный; ра́дуйся, Милости сосуде, Богом избранный.

Ра́дуйся, Всецари́це, неду́ги на́ша благодáтию исцеля́ющая.

Конда́к 13

О Всецари́це Ма́ти, ро́ждшая всех святы́х Святе́йшее Сло́во, ны́нешнее на́ше прие́мши песнопéние, от вся́кия сме́ртныя боле́зни исцели́ ны и бу́дущаго изба́ви осужде́ния вопи́ющих: Аллилу́ия.

Сей конда́к глаго́лется три́жды. И па́ки чтéтся 1-й и́кос и 1-й конда́к.

Моли́тва

О, Пречи́стая Богома́ти, Всецари́це! Услы́ши многоболе́зненное воздыхáние на́ше пред чудотво́рною ико́ною Тво́ею, из уде́ла Афóнскаго в Росси́ю принесéнною, при́зри на чад Твои́х, неисцельными неду́ги стра́ждущих, ко свято́му о́бразу Тво́емý с ве́рою припа́дающих! Я́коже пти́ца крило́ма покрывáет птенцы́ своя, та́ко и Ты ны́не, при́сно жи́ва сýщи, покрый нас многоцеле́бным Твои́м омофо́ром. Та́мо, иде́же наде́жда исче́зает, несумне́нною Наде́ждою бу́ди. Та́мо, иде́же лю́тыя ско́рби превозмога́ют, Терпéнием и Осла́бою яви́ся. Та́мо, иде́же мрак отча́яния в ду́ши всели́ся, да возсия́ет неизрече́нный свет Божества́! Малоду́шныя утэ́ши, немощны́я укрепí, ожесточе́нным сердца́м умягче́ние и просвещéние да́руй. Исцели́ боля́щия лю́ди Тво́я, о всеми́лостивая Цари́це! Ум и ру́ки врачующих нас благослови́; да послужат ору́дием Всемо́щнаго Врача́ Христа́ Спа́са на́шего. Я́ко живей Ти сýщей с на́ми мо́лимся пред ико́ною Тво́ею, о Влады́чице! Простри́ ру́це Тво́й, исполненней исцелéния и врачбы́, Ра́досте скорбя́щих, в печáлех Утешéние, да чудотво́рную по́мощь ско́ро получи́вше, прославля́ем Живонача́льную и Неразде́льную Трои́цу, Отца́ и Сы́на и Свята́го Ду́ха, во ве́ки веко́в. Ами́нь.